

## AN PEDER PLUVEN

A.E.W. Mason

*An kensa peswardhek paragraf*

Y teuth Iscapten Sutch dhe Broad Place kyns ès ôstysy erel Jeneral Feversham. Devedhys veuva pypm eur adro, ha'n dohajëdh leun a howl in cres Efen, pàn wolowy an chy coth a vryckys rudh, byldyes wàr unn leder soth a vreow Surrey, gans tomder a jowal druth in mes a dhownder bagas sabwëdh tewl. Iscapten Sutch a gloppyas der an hel, mayth esa portreyansow an teylu Feversham owth ascendya an eyl a-ugh y gela bys i'n nen, ha mos wàr an terras cauncys wor'tu delergh in mes. Ena ev a gafas an ost a'y eseth yn serth kepar ha maw, ow miras dhe'n soth, tro ha'n Sussex Downs.

"Fat'lyw an arr?" a wovynnas Jeneral Feversham, ha sevel scav a'y jair in bàn. Den tanow bian o va, ha bewek in despît dh'y vlew gwynn. Saw an bewder o longus only dh'y gorf. Bejeth asornek, uhel cul y dâl ha looslas y lagasow heb cher, a hyntya brës nag o gwresen.

"Hy a wre trobla i'n gwâv," Sutch a worthebys. "Saw yth o dhe wetyas." Jeneral Feversham a wrug inclynya y benn, ha'n dhew dhen ow tewel polta. Dhia'n terras yth esa an dor ow codha desempys bys in plain gwastas ledan: gwerasow gorm ha gwelyow glas ha bonias gwëdh tewl. Dhywar an plain-ma y terevy levow dre an howl, bian mès fest cler. In nes Horsham, pell alemma, yth esa torgh a vog gwynn train ow qwia'n qwyck in mesk an gwëdh, ha wàr an gorwel y terevy an Downs, brith a galgh gwynn.

"Ny veu marth pàn y'th kefys omma," yn medh Sutch.

"Cornet neb o moyha kerys dhe'm gwreg," a worthebys Feversham, ha'y lev heb emôcyon vëth. "Y fedha hy a'y eseth omma, lies our. Dâ gensy, coynt lowr, o pùb tyller efan ha gwag."

"Eâ," yn medh Sutch. "Awen desmygy a's teva. Y hylly hy frederow aga fobla y."

Jeneral Feversham a dôwllys golok wàr y goweth, kepar ha pàn na wothfa scant convedhes. Saw qwestyon ny wrug ev. Myns na wodhya convedhes, y fedha ow scappya in mes a'y benn avell tra heb dendyl ùnderstandyng. Ev a gôwsys a gen testen heb let.

"Agan bord a vëdh cotta haneth, unn astell."

“Eâ. Collins, Barberton, ha Vaughan re beu tremenys i’n gwâv eus passys. Wèl, yth eson ny oll gorrys fast adenewen solabrës wâr rol hanter-gober an bÿs. Nyns yw coloven an covscrÿvow ma’s an dewetha furvuster rag agan nôtya in mes a’n Servys yn tien,” ha Sutch a wrug istyna ha sewajya an arr evreth, a veu gwrynnys ha dyfelebys nans o poran peswardhek bledhen, pàn godhas skeul assaultya.

“Pës dâ oma, ha ty devedhys kyns ès an re erel,” Feversham a wrug leverel pelha. “My a garsa clôwes dha vreus. An jëdh-ma yw moy y bris dhymm ages bos penn bloodh agan omsettyans wâr an Redan. I’n very prës-na mayth esen ny sevys yn ervys i’n tewolgow –”

“A’n tu west dhe’n mengledhyow, remembra dell wòn,” Sutch a wodorras y gows, hag anella yn town. “Fatla yller ankevy?”

“I’n very prës-na, Harry a veu genys i’n chy-ma. Ha my ow tyby, ytho, na ves dysentyes, y halsa ev haneth jÿnya dhyn ny. Dre jauns yma va chy. Ev a vynn, heb dowt, entra i’n servys, hag ev a dhesk neppëth, martesen, a vëdh vas yn moy dhewedhes – pyw a wor?”

“Heb mar,” yn medh Sutch, hag yn fen. Rag vysytys dhe Jeneral Feversham o lymtyes dhe ocasyon an conow penn bloodh-ma, ytho ny dheuth ev bythqweth na whath warbynn Harry Feversham.

Lies bledhen yth esa Sutch ow covyn orto y honen pana nas in Jeneral Feversham a dhynyas Muriel Graham, benyn kemmys dhe verkya rag afinans hy skentoleth avell rag tecter hy ferson; saw ny wodhya ev cafos skyla bythqweth. Ny ylly ma’s bos contentys a’y wodhvov y whrug hy demedhy an den-ma, cotha yn frâs agessy, ha mar dhyffrans y natur. Coraj personek hag omfydhyans andovadow o an chif-qwalyta dysqwedhys, nâ, an qwalyta unnyk dhe bercêvyä, in Jeneral Feversham. Iscapten Sutch êth in preder wâr dhelergh dres ugans bledhen, ha’y eseth stag ena wâr y jair lowarth, bys in unn termyn o kyns ès y gevrän ev, avell sodhak dhe vrygâd an Lu Lestry, i’n omsettyans penhelygen-na wâr an Redan. Ev a remembra sêson in Loundres may teuth ev nowyth dy in mes a’n stacyon Cathayek; ha whans a’n jeva metya gans Harry. Ny vynna amyttya bos hemma tra vëth ma’s desîr natÿral in nebonen, evredhys pàn o va soudor whath yonk, a wrug hobba a studhya gnas mab den. Ow qweles mars o an maw haval dh’y vamm pò dh’y das, ev a gemery les – heb namoy.